

**Акафист святому праведному Феодосию,
пресвитеру Мелитопольскому, исповеднику**

Кондак 1

Избранному Господом служителю Церкви Божия, пресвитеру праведному и верному свидетелю, Феодосию преславному песни принести дерзаем и, подвиги того воспевающе, со умилением зовем: Радуйся, отче Феодосие, предивный исповедниче веры Православныя.

Икос 1

Архиерея вечнаго, Господа Иисуса Христа, явился еси служитель преславный, отче досточудне Феодосие, данный бо ти Залог даже до последняго своего издыхания сохранил еси и веру свою страдании запечатлел еси, темже мы дерзаем ти похвалы сицевыя воспети:

Радуйся, веры светильниче неугасимый;
Радуйся, исповедания адаманте несокрушимый;
Радуйся, служителю Господень всеусерднейший,
Радуйся, Небеснаго Домовладыки рабе благий и верный;
Радуйся, пастырю Церкви Христовыя;
Радуйся, тружениче вертограда Божия;
Радуйся, подвижниче препрославленный,
Радуйся, молитвенниче о нас всеусерднейший;
Радуйся, отче Феодосие, предивный исповедниче веры Православныя.

Кондак 2

Видящее в тебе, отче, усердие о спасение и ревность о славе Божией, благочестивыя родители твоя отдаша тя на научение книжное, да просвещен Премудростию Божиею, научиши и иныя купно с тобою песнь Богу приносить: Алилуиа.

Икос 2

Разум богопросвещенный стяжав, отче наш Феодосие, от юности твоя возлюбил еси благолепие дома Господняго и место селения славы Его, от лет младых на служение Богу себе предуготовал еси, светом молитв освещая путь научения книжнаго, темже приими от нас похвалы сия:

Радуйся, суету вселукавую отринувый,
Радуйся, спасения всем сердцем возжелевый;
Радуйся, свеще, молитвой пламенеющая,
Радуйся, кадилнице, добродетельми благоухающая;
Радуйся, светом Истины осиянный,
Радуйся, огнем божественным всеразженный;
Радуйся, проповедниче Евангелия всеусердный,
Радуйся, Таин Божиих служителю благоговейный;
Радуйся, отче Феодосие, предивный исповедниче веры Православныя.

Кондак 3

Силою Вышняго укрепляемый, Горняя возлюбил еси, небрегше дольняя, и ко небесному взор твой обратил еси, отринувше попечение о земном и тленном, путь служения церковнаго избрал еси, отче, да Господу послужиши и Тому прилепишися и Сему Единому песнь воспоеши: Аллилуиа.

Икос 3

Имуще сердце чисто и разум богопросвещен, делатель всеусердный вертограда Божия явился еси, отче достоблаженне Феодосие, егда от десницы святительския епископа Димитрия поставление приял еси на служение священническое, темже, зряще тя пастыря всеусерднаго, сие ты воспеваху паства твоя:

Радуйся, пастырю наш добрый,
Радуйся, отче милостивый и кроткий;
Радуйся, священниче богопросвещенный,
Радуйся, иерее богоизбранный;
Радуйся, жребий Господень во смирении приявый,
Радуйся, крест служения пресвитерскаго на рамена своя подъявый;
Радуйся, Господа учениче всеизрядный,
Радуйся, апостолов последователю усердный;
Радуйся, отче Феодосие, предивный исповедниче веры Православныя.

Кондак 4

Буря искушений и скорбей настуже ты отче, егда по немногом времени лишился еси супружницы твоя Пелагии, яже отыде от земнаго жития к Небесному. В сих же обстояниях не предался еси печали и унынию, но все упование свое на Господа возложил еси, горесть вдовства молитвою растворяюще и Утешителю Преблагому вопиюще: Аллилуиа.

Икос 4

Слышати и воспевати чудеса Господня восхотел еси отче, темже избрал еси путь тесный и многоскорбный пресвитера воинскаго, да во бранех сущим людем православным утешение от Господа преподати возможеш и ко подвигу сих укрепиши наставлении своими. Темже воины православнии яко отца своего духовнаго ты воспеваху сие:

Радуйся, души наша Словом Божиим просветивый,
Радуйся, сердца наша питием благочестия напоивый;
Радуйся, Кронштадскаго чудотворца всеславный учениче,
Радуйся, неутомимый истинныя веры проповедниче;
Радуйся, неисчерпаемый премудрости источниче,
Радуйся, Вечнаго Евангелия всехвальный благовестниче;
Радуйся, звездо пресветлая неба церковнаго,
Радуйся, цвете всеславный вертограда небеснаго;
Радуйся, отче Феодосие, предивный исповедниче веры Православныя.

Кондак 5

Боготечную звезду в земном странствии твоём – Закон Божий обретше, посреде суши и моря явился еси служитель неленностный Господа и Бога твоего, морскую пучину молитвами твоими укрощаючи и воинов православных благодатию Божией укрепляюще. Егда же раны тяжкия приял еси, на Господа все упование возложил еси и от Него же исцеления сподобился еси, да и на будущее время явишися пастырь неленностный, посреде бурь и искушению научающий всех Богу взывати: Аллилуиа.

Икос 5

Видеша тя паства твоя, отче наш Феодосие, всего себе в служение Господу предавшего и противостоящего буре злокозненных искушений, юже враг спасения нашего на Церковь воздвиже. Темже, обретше тя наставника предобраго, во время соблазнов от Бога дарованного, сицевыми похвалами величаху тя людие православнии:

Радуйся, броней правды облеченый,
Радуйся, венцем богомудрия увенчанный;
Радуйся, веры православныя утверждение,
Радуйся, заблуждающих вразумление;
Радуйся, путь ко спасению нам возвестивый;
Радуйся, многия ко Христу возвративый.
Радуйся, яко тобою истина проповедуется,
Радуйся, яко тобою всякая лесь отгоняется;
Радуйся, отче Феодосие, предивный исповедниче веры Православныя.

Кондак 6

Проповедниче всеславный милостей Господних явился еси, отче наш Феодосие, посреде бури злыя непрестанно зывающее «Крепость моя и пение мое Господь», и наставляюще люди православныя, да не убоятся нечестивых прещения и злокозненныя сатанинския ненависти и не преклонят колена своя пред истуканом безбожия, но присно Господа исповедуют, вопиюще: Аллилуиа.

Икос 6

Возсиял еси светом Истины посреде мрака неверия, Феодосие богомудре, утверждая паству свою твердо исповедати веру Православную и не уклонятися на путь погибельный ересей и расколов. Служители же злобы преисподняя на тя гонение воздвигнути потщашася, да пастыря поразившее, овцы разсеяти возмогут. Темже, отче, твердость твою во исповедании зряще, воспеваем подвиги твоя:

Радуйся, правды Божией светильниче,
Радуйся, Истины Христовыя провозвестниче;

Радуйся, Светом Невечерним озаренный,
Радуйся, Славою Божией просвещенный;
Радуйся, лживыя неправды потребителю,
Радуйся, мглы неверия отгонителю;
Радуйся, гонения за Христа претерпевый,
Радуйся, поношения ради Слова Божия приявый;
Радуйся, отче Феодосие, предивный исповедниче веры Православныя.

Кондак 7

Хотя Человеколюбец Господь явити Свое к нам милосердие, промыслом Своим предивным преведе тя, отче преславне, от Херсонеса древняго во град Мелитополь, да явишися пастырь истинный и отец чадолюбивый людем православным, просвещая тьму безбожия подвиги преславными своими, ихже прославляюще, воспеваем Господа, во исповедании тя укрепившаго и венцем нетления увенчавшаго, вопиюще Аллилуиа.

Икос 7

Новый исповедник, воистину, показался еси, отче преславне Феодосие, не убоялся бо еси, , последователей древнего Нерона, тело твоего погубити тщавшихся, души же не могущих вредити, но сих всяческия коварства во уметы вменил еси, посреде страдания молитвою себе укрепляюще. Темже, воспоминающе терпение твое, во умилении воспеваем:

Радуйся, Православия поборниче препетый,
Радуйся, образе исповедничества всетвердый;
Радуйся, печи вавилонския не устрашивыйся,
Радуйся, прещения мучителей не убоявыйся;
Радуйся, росе, еюже огонь безбожия угасается,
Радуйся, море, имже зловерие потопляется;
Радуйся, зеркало благодати всесветлое,
Радуйся, похвало наша всерадостная;
Радуйся, отче Феодосие, предивный исповедниче веры Православныя.

Кондак 8

Странное чудо зрим на тебе, отче всеславне, старец бо сый многотрудный, якоже юный подъемлещи на ся подвиг исповедничества и , не убоявшееся темницы многоскорбныя, сияещи чистотою и крепостию, яко адамант преславный Истиныя веры, посреде узилища Господу молитву приносяще и со слезами пение растворяюще: Аллилуиа.

Икос 8

Весь воистину явился еси отче, наследник обетования евангельскаго, и блаженство вечное улучити сподобился еси, Господу своему последствующе даже до Голгофы, скорби, бесчестие, раны и темничное заключение за Него

радостно претерпел еси и ныне возшел еси в радость Спаса твоего, темже от нас приими пение сицевое:

Радуйся, Господа всем сердцем возлюбивый,
Радуйся, даже до смерти Ему последовавший;
Радуйся, Христу сораспявшийся всерадостно,
Радуйся, страдания приявший безропотно;
Радуйся, Крест Господень на рамена своя приемый,
Радуйся, на Голгофу ликующе восшедый;
Радуйся, страданий Христовых Соучастник,
Радуйся, Воскресения Его сопричастник;
Радуйся, отче Феодосие, предивный исповедниче веры Православных.

Кондак 9

Всякое претерпел еси Христа ради страдание, ризу души убеливше кровию Агнца Божия, за грехи мира Самого Себе в жертву живожертвенную принесшаго, и Сему последствующе, возшел еси на Брак Агнчий, идеже во славе Небесней со всеми святыми песнь победную поеши: Аллилуиа.

Икос 9

Веттия многословных не возмогут достойно воспети подвиги твоя, отче Феодосие, страдания бо, муки, избияния, заушения, напраслину и мрак темничный Господа ради претерпети сподобился еси, темже и украсился еси венцем победным, егоже обеща Господь всем верным, и песнями сицевыми ублажаешься:

Радуйся, победы, мир победившей, сонаследниче;
Радуйся, Царствия Небеснаго сопричастниче;
Радуйся, мучеников древних сотаинице,
Радуйся, ликов ангельских сомолитвенниче;
Радуйся, веру истинную даже до конца сохранивший,
Радуйся, Господа даже до страстей исповедавший;
Радуйся, мрак темничный светом молитв твоих осветивый,
Радуйся, венец небесный от Господа приявший;
Радуйся, отче Феодосие, предивный исповедниче веры Православных.

Кондак 10

Спасение вечное уличити тщася, к нетленному устремился еси, отче Феодосие, тленное оставльше, темже ныне яко праведник и иерей Бога вышняго, веру свою подвигом исповедничества запечатлевый, сподобился еси наследовати Царствие Божие, праведникам от создания мира уготованное, идеже купно со всеми святыми Бога воспеваеши, поюще: Аллилуиа.

Икос 10

Стены темничныя и узилище многоскорбное уготовляше ти, отче преславне, наследницы новыя гонителей древних, ты же, не убояшеся сих прешения, со апостолом глагола еси: «вся могу о укрепляющем мя Иисусе», темже и ны укрепи молитвами твоими, вопиющих сице:

Радуйся, узами темничными узы злобы сокрушивый,
Радуйся, муки и скорби ни во что же вменивый;
Радуйся, Путем Господним присно ходивый,
Радуйся, многих от путей погибельных отвративый;
Радуйся, трапезою Небесною насыщенный,
Радуйся, питием безсмертия напоенный;
Радуйся, светом небесным души наша озаряющий,
Радуйся, и ныне благословением твоим нас осеняющий;
Радуйся, отче Феодосие, предивный исповедниче веры Православныя.

Кондак 11

Пение наше всеумиленное прими ныне, Феодосие богомудре отче наш, и от обителей славы небесныя призи на чада твоя духовныя, молитвами твоими во Православии ны утверждающе, да сподобимся во веки веков Господа славословити и с тобою купно Тому пети: Аллилуиа.

Икос 11

Светоносен светильник веры истинныя явился еси, отче Феодосие, и хранитель земли нашея, заступление христианом православным и чудотворец изрядный, сего ради прославляешися похвалы сицевыми:

Радуйся, правило веры и благочестия,
Радуйся, образе святости и смирения;
Радуйся, Святыя Троицы пречистое селение,
Радуйся, ангельскаго жития уподобление;
Радуйся, всесветлое благодати приятелище,
Радуйся, земли нашея чудное сокровище;
Радуйся, Церкви Христовыя столпе непоколебимый,
Радуйся, Православия светильниче неугасимый;
Радуйся, отче Феодосие, предивный исповедниче веры Православныя.

Кондак 12

Благодатное украшение Церкви Православныя и земли нашея плод всеблагословенный, пастырства истиннаго образе и исповедания крепосте неодолимая, Феодосие преславный и богомудрый, молитвами твоими вся во Православии утверди и научи Господа непрестанно славити: Аллилуиа.

Икос 12

Поюще твое чудесное заступление, прославляем тя, отче Феодосие, яко молитвенника о нас преславного и чудотворца милостиваго и величаем тя, глаголюще:

Радуйся, в молитве к Богу предстоятелю;

Радуйся, Небесных благ всеславный раздаятелю.

Радуйся, чудес источниче неистощимый;

Радуйся, исцелений кладезе неисчерпаемый.

Радуйся, ко благочестию нас ученьми своими наставляющий;

Радуйся, от всякия напасти нас избавляющий.

Радуйся, яко предстательством твоим мир с Богом обретаем;

Радуйся, яко молитвами твоими к Небеси восходим.

Радуйся, отче Феодосие, предивный исповедниче веры Православных.

Кондак 13

О, всеславне и богомудре отче наш Феодосие! Се, предстояще пред ракою честных мощей твоих, со слезами и умилением сердечным молим твою благостыню, да николиже оскудеет ходатайство твое пред Богом о нас грешных и недостойных, да богоприятными мольбами твоими пробавит Всевышний Господь милость Свою над боголюбивым градом и православным Отечеством нашим, да укрепит веру святоотеческую, да научит ны примером праведнаго твоего жития единому точию на потребу служити и угождати, и да подаст нам вечное спасение, во еже с тобою в селениях праведных воспевати непрестанно: Аллилуиа.

(Этот кондак читается трижды, а затем икос 1 и кондак 1)

МОЛИТВА

О, благодарованный пресвитере и служителю Божий, отче святой Феодосие, избранниче и пастырю Христов! Ты измлада Бога искренне возлюбил еси, душу храмом Святого Духа соделал еси изрядно, всего себе, яко жертву непорочну, Спасу Христу предал еси.

Ты, святе, пастырь дивный в земле нашей на радость и утешение явился еси, дары Божия людям страждущим показуя. Темже и мы, недостойнии и грешнии чада твоя, дивящися твоему пред Богом дерзновению, его же восприял еси за чистоту души твоя, взываем к тебе сице: испроси благостояние Церкви Русстей, в море житейском обуреваемей, Отечеству нашему мир и обновление духовное; нам же утверждение и преспеяние в вере, христианскую кончину и Божие милосердие на Страшном суде Христовом, идеже праведницы возсияют, яко солнце, с нимиже да прославим вечно в Троице певаемого Бога, Отца и Сына, и Святого Духа. Аминь.